

Ooldejaorsaovend
Offerfeest (islam)

Ni'jjaorsdag
Dag van de Vrede


zundag

maendag

31

1

december weke 52/1 **jannewaori**



Veul heil en zegen in et ni'je jaor!

De laeste dag van et oolde jaor en de eerste van et ni'je. Waor zollen we et dan eers over hebben moeten as over euliebollen, eulieflutten of euliekoeken? Dat ze (meerstal) lekker binnen, weten we allegere wel. En dawwe d'r misschien ok wel es wat te vule van hebben of eten, weten we ok wel. D'r bin hiel wat huusdieren die d'r daarom van mit genieten, bi'j jim dan? Trouwens, we hebben ok wel es heurd van dronken kiepen die de laeste boerejonges kregen hadden...

Bi'j de woorden euliebollen, eulieflutten en euliekoeken staon in et Stellingwarfs Woordeboek niet veul biezonderheden. Allieand in Makkinge en Langedieke numen ze wat vremde, sloege personen wel es euliekoeken: *Dat is een rere euliekoeke* (Langedieke), *'t Is wat een euliekoeke* (Makkinge). En et schient dat een oolde bi'jnaeme veur meensken uut Stienwiek *Stienwieker euliekoeken* is!

Dan mar es bi'j *eulie* kieken. Dat zit in de buurt. Now, dat liekt beter, alhoewel, aj' de uitdrottings mit dat woord zien...:

Die is (dikke) in de eulie - die het te vule op, is dronken (Der Izzerd, Hooltpae, Makkinge, Ni'jhooltpae, Ooldetriene, Sunnege, Oosterwoolde)

Dat is eulie op 't vuur - dat maekt de ruzie allieand mar groter (Ni'jberkoop, Ni'jhooltpae) ... *eulie op 'e golven* - (Berkoop, Ni'jhooltpae)

Koffie as eulie - slim lekkere koffie (Berkoop, Ni'jhooltpae)

Zo glad as eulie - zegd as d'r wat slim smerig is (Noordwoolde)

Et is zo dik as eulie - as vloeber goed dikke is (De Langelille)

Zo dom as eulie - euliedom, en et schient dat iederiene die uitdrottung wel kent!

Wi'j weensken jim veur et kommende jaor alle goeds, en misschien tot kiek in de ni'je Stellingwarver Spreukekelinder!